

第三編

遠東通信社
錄

上海商務印書館發行

遠東通信社叢錄

歐洲通信第三編

第一卷 民國元年正月

美德關稅問題之衝突 正月一日

美德近以關稅問題大起衝突。美外務卿諾克斯極怒德之舉動。聲言必須設法報復。刻下德政府靜以待變。並無如何布置。惟對於美國鹽肉及鹽硝輸入德境之時。諸多挑剔。雖目下兩國外交尚未破裂。然其雙方感情之惡。已播傳於柏林華盛頓矣。先是美國特許加拿大製紙材料自由運輸入美。不必繳納進口稅。然並無何等之利益交換也。德人對此大不謂然。蓋德國紙料每年輸入美國者。計有三百餘萬噸。約值六百萬佛郎。而德與美從前所訂商約。其中載明德貨入美。繳納進口稅。與美國所收他國進口稅之最輕者爲比例。此約意義。與現時美加所訂商約。毫無差異。今美許加之紙料入美。不必納稅。則德亦有權請美免稅也。月前德駐華盛頓大使曾將以上之意函詰美外部。美外部久置未復。德亦從此不再催問。乃藉改訂德瑞商約。而思牽掣美人以爲抵制。蓋德瑞商約中有稅則兩條。與美商在德之利益有極大之關係。卽鋼板與橡皮靴二項是也。美人運此兩項入德。爲數至鉅。瑞典有起而與美相爭之勢。德乃許瑞以此兩項貨物入德。不必納稅。美人因此大受打擊。羣起反對。在德一面。以爲美德商約其性質與美加商約無異。而德美商約之內容。又與德瑞商約略同。倘美可許加之紙料不必納稅。則德亦可許瑞之鋼板及橡皮靴不必納稅。用爲抵制也。按德以在歐孤立。其連美之心至切。去歲德皇賞美之第一巨富摩根 Pierpont Morgan 以頭等紅鷹寶

星世人大爲注意。顧德皇猶以爲未盡其要好之忱也。乃復以其半身肖像。寄駐美之德總領事。命其轉交摩根。並告之曰。此係德皇與君個人交誼。深望德美更事接近。嗣德政府又以留美之德美教員會介紹。敦請美國大學校及公學之教員。六百人來德游歷。所有川資均歸德國饋贈。此蓋德政府欲乘此機會以表其與美之交誼。而使美人傳播國中也。德國駐美大使白石叨夫男爵曾被舉爲此項游歷觀光團之會長。從事組織一切。德政府復照會各自治區長預備宴會。陳設音樂。德國哥倫地方之自治區長。於游歷觀光團經過該處時。大宴之於極著名之客廳。並請各員瀏覽野納 *Yona* 風景。且開特別之音樂會。而野納之自治區長亦張大筵以宴之。最近德皇尙派其第三皇子阿爾貝乘坐兵艦。前赴紐約及紐保拜謁。則德之欲與美交歡。固確切無疑者矣。當德皇與美聯絡。而德商部則一面以商約關稅問題與美立於絕點反對之地位。法報借此挑釁。謂德政府種種與美交歡皆爲掩飾其向美要求關稅從廉並其反對美許加釐大紙料免稅之形迹耳。論其實際。德即請美紙料免稅亦無十分利益。彼其所值。每年不過五百萬佛郎。而德於去年十二月起。許瑞典免稅者。亦僅製成橡皮靴及鋼板兩種。每年不過一百萬佛郎。是德之請美免稅。既無所益。許瑞免稅。復無甚損。仍不出於外交作用。欲陷美於困難境地。而使他國知所鑒戒。並無真不相容之處。決不能因此而起風潮。將來德必自出與美連和。或犧牲其徵稅。或藉他事以調停之。皆在意中。特其調停之法。出於商務。抑出於政治。則不得而知也。

歐報對於中國革命之輿論

正月三日

其一

哥倫日報在德國新聞界勢不甚大。日前著論。代表德人對於中國共和運動之意見。至爲明晰。全論甚長。茲述其總括之辭如下。『中國將來政體。改爲共和。抑仍君主立憲。與德毫無關係。此其中之利害。中國人宜自

審度。無勞外人代計。彼其人民大多數之程度已達共和乎。或其改爲共和後。於政治及經濟各方面有長足之進步乎。在中國人必已籌之至熟。此皆關於中國內政。吾德從未思及干預。但願亂事速定。其主權者。無論何一方面與德繼續睦誼。則德之所深願也。』

其二

泰晤士報北京專電。前傳英日干涉共和。現時似已無復阻礙。已有上諭召集國民會議。決定政體。在唐專使之計畫。係請於二十二行省中。每省出代表三人。皆由各省諮議局公選。其召集期。以三個月爲限。共和黨人則以時日太久。迫不能待。堅請卽以南京現有之十四省代表組織。彼此相持不下。袁內閣仍持君主立憲。蓋彼深知君主立憲辦法。其於民生幸福。必較共和爲更穩固。彼決不允就大總統。卽國民多數舉之。彼亦必辭謝也。吾（毛利孫自稱）以爲袁實滿洲皇室之忠臣。倘皇室真願遜位。亦以大總統一席奉之於袁。則彼時袁或改其態度耳。

其三

倫敦每日電報新聞專電。謂皇上及太后均已出京。道過奉天。將前往蒙古。一時各國報紙均用大字標題。頗動聞聽。同日該報復謂。俄政府已決議不與共和政體反對。惟須能組織一強有力之中央政府。俄固無意於干涉中國內政也。又謂日前日本內閣會議。特召北京衛兵統帥青木。由朝鮮速行回國。參預閣議。其事至堪注意。

其四

北京獨立報著論。謂孫逸仙被舉爲大總統。欲知其關係如何。首須研究此項選舉。僅由革黨一面。抑由全國代表。吾等似覺北方各省並未與聞。此時皇室原無希望。袁內閣亦大減其銳氣。彼已宣言北軍現時勢難平。

定內亂。並謂彼願服從多數決議。凡此皆足表見袁於共和已無術足以抵抗。彼爲皇室惟一之保護者。而其
所言如是。則皇室之失敗無望。可斷言矣。其實皇室早已處於無權之地位。當其既頒明詔。召集國民會議。付
以決定政體之權。是即不啻遜位。彼亦預知共和黨人決不承認君主立憲。即使國民公意欲用君主立憲。亦
必擇漢人爲君主也。滿洲皇室已不能得外國之助力。至是已大明著。有謂英日連合保障。此恐未確。往日原
有政家願出干涉。頗聞元老會議不以爲然。英政府已一再宣告完全中立。日爲英之同盟。彼必盡其忠告。似
難聽其干涉中國內政。其餘他國。倘於彼之人民生命財產無所損傷。更無出而干涉之理。無論何國人民。皆
自有其全權。選定本國政體。外人不得過問。昨日哥倫日報著論。已足表示德之政見。德且如是。則歐陸他強
更不問可知矣。雖然。中國此時仍須留意。不得以爲即無野心之國窺伺其旁也。特彼之出而干涉。並不以反
對中國之進步爲目的。乃以擴充彼之慾望爲目的耳。就中如俄國之類。尤覺可怕。彼已備兵入蒙古。或占領
一二地。或占領其全部。但俟機會以爲因應。如有不能。則必預爲將來併吞之地位。彼豈真助蒙古之獨立哉。
不過取日本待朝鮮之舊策。是將牽動全世界之大問題。歐陸列強。今年其多事乎。

其五

日前各報均稱俄向中國要求蒙古鐵路。並請將蒙邊與俄接壤之處。劃成直綫。泰晤士報駐森堡訪事力爲
辨護。謂俄僅欲擴張其在蒙古之商務。並無占據土地之意。前此俄皇接見蒙古王公所派代表。不過爲宗教
羈縻起見。無關緊要。此事未足改變俄之政策也。有謂西藏達賴喇嘛所派代表多佛耶夫現在森堡。此確有
之。惟與俄並無密議。以上兩事。俄政府與英政府交通頻繁。毫無隱瞞。不必慮也。按英俄連合。故其所言如是。
在有識者視之。殆欲蓋彌彰耳。

歐報對於中國革命之輿論

正月四日

其一

昨日倫敦泰晤士報著論。謂漢口重行開仗。各國於中國有利益關係者。均大恐慌。本館接得短電。據稱革黨誤攻官軍。實係錯認停認之約。未能繼續。並非有意。官軍則大欣悅。以爲借此可以破約。就北京訪員來函觀之。倘政府與革黨兩面真願平和解決。以國民幸福爲念。並無不能相合之理由。朝廷明詔。以決定政體之權。付諸國民會議。是已讓至極地。至於召集方法。自以袁內閣所主張廣其範圍。始能真得民意。聞已商定每省出代議士三人。惟於選舉手續。及其召集之時日與地點。未能同意。革黨欲以十四省在南京代表。卽作爲國民會議代表。北京當亦不難許之。特此各代表之來源。乃係由各省革命政府派出。並非由諮議局公選。袁於此端。頗事批評。亦極有理。總之不得卽謂無平和之希望耳。吾等亟望戰事不至再起。在兩黨各有極大之危險。而全國之生死存亡。關係尤爲重大。以中國人聰明愛國。未始不能見及此也。利害切膚。彼中國人應早自爲熟籌。必如何始克統治全國。維持秩序。非外人所能代計。至吾外人之所祈禱者。總以能保安寧爲惟一之目的。政體如何。原非所擇。但共和黨力言國民於共和外。無他政體可議。此亦恐未盡然。袁之主張。君主立憲。誠有深意。就全亞情勢及中國歷史而論。實惟君主立憲爲最適宜。況中國大多數人民。皆有君主觀念。彼之希冀立憲。定較共和爲深切也。民權自由等說。不過最近數年留學生所倡導。而自美回國者。乃欲以劇烈之共和主義。改造數千年之古國。不能無疑。現時風潮激盪。國民真實之意見感情。殊難表現。將來究能融洽與否。是又一問題矣。袁內閣似以革黨要求爲太過分。彼乃其改革黨。彼乃立憲政體之保障者。豈願爲國民公敵乎。不過在彼意見。以爲驟由專制而躋共和。未免躡等。深恐滅裂破碎。反於大局有害。如非萬不得已。總以避去爲愈。是袁與革黨所不能合者。卽彼以爲共和非中國現時萬不得已之問題。倘用君主立憲。則其改革進步之速。或較共和有過之無不及耳。

其二

巴黎日報專電。謂中國現勢離奇。頗難得其真相。孫袁勝負。任何方面。皆不克統一中國。各省互相猜忌。互相妬視。卽有賢者。亦專爲其本省利益。錙銖較量。無肯犧牲公益。顧全大局之人。經濟現相極壞。徧地皆陷於無政府之景象。官革兩軍皆無紀律。多爲月餉而來。臨戰逃亡紛紛。大不足靠。

其三

巴黎迭霜日報載十二月二十三號上海訪事專函。謂上海商務。刻已壞至極點。各商店備役大爲裁減。普通開支亦節省至數倍。似此情勢。亂事決難再延。民黨無統一機關。僅就上海一隅。已足概見他處。此間革黨首領。既已互相猜忌。則其他之各省城鎮。更可不問而知。處處人自爲政。破碎滅裂。欲其集合此離異之分子。而建設一中央政府。實非易事。倘無一強健有爲之大政治家出現。亂事正未艾也。袁世凱殊有統一全局之力量。惜其政策不甚堅定。彼係漢族。不能無所顧忌。現袁於皇室及民黨間。皆能保其良好之感情。或者彼漸超然於此二者之上。而爲將來中國之真主人乎。此則吾外人之大幸也。民黨及政府兩面。均絀於款。列強尊敬中立。任何方面不肯通融。蓋深懼引起排外風潮。而擾及居留者之生命財產也。

歐報對於中國革命之輿論

正月六日

其一

數日來紐納克哈爾特之專電甚多。歐報均轉載之。其言未必全近事實。特以其影響於輿論頗大。爰照譯出。閱者諒之。

袁內閣入宮謁見太后。並呈北軍各統帥公電。卽求皇室及各親貴毀家抒難者也。各軍均稱倘有接濟。當繼續與革黨搏戰。且效忠於朝廷。以血易君主立憲。保證十九信條得以實行。不謂革黨並非共和。實係專制武

斷萬難聽其長此橫行無忌。非以武力與爭。無以保全中國。亦不能得真自由云云。袁亦稱倘皇室及親貴不能籌餉。彼亦即須辭職。又電謂袁深不滿意於各王公。因此遂告病假。此或其乞退之先聲也。又電謂袁與各王公討論上海會議諸條件。濤朗兩邸於召集國民會議一事。極力反對。慶邸則甚助袁。後太后卒定大計。明頒上諭。似無更改之餘地矣。又電謂袁之銳氣大減。一則籌款不得。二則各外交官均以爲情勢更壞。將來定係共和黨占優勝。惟恐北京政府倒後。共和黨不能組織完全。乏統一全國之力。勢必陷於恐怖時代。殊足憂耳。又電謂外人均恐北京政府將另換一都城。昨日上諭朝廷降讓已達極點。中外人士密談均以爲或另有隱謀。非真意也。袁內閣亦深知時局緊迫。已無良法足以挽回。彼謂往時誤聽其友之勸。與革黨一再講和。彼時兵力實足平定。今則不能。蓋已無款也。袁對外人宣言。彼願服從國民多數之決議。惟無論如何。彼則始終忠於朝廷。終身不爲共和黨所用。以自表白其苦忱而已。又電唐紹怡已辭議和全權專使之職。袁謂唐太偏於共和。彼且變爲所賣。又電官革兩軍已於一號在蔡甸附近開仗。終日礮聲未絕。

其二

倫敦每日電報新聞專電。中國現勢更壞。共和運動定致全國分裂。袁已無款。僅得愛國捐一兆。決難支持長久。山東山西兩省皆有革黨前往運動。已有與官軍開仗消息。各處皆陷於無政府之狀態。至爲可慮。又電南北意見較前更甚。袁與革黨談判決不能和。袁請國民會議開於北京。須有三分以上之議員到齊。始得開會。革黨不願以北京爲召集地。且僅允每省派出三人。袁則必須每府派出一人。因此不能解決。現袁已得內帑足支三月。以袁一人之力。究能平定與否。殊難預料。惟中國情勢日趨危險。內部分裂則可斷言耳。

法人探險隊勒穰德之遇險

正月七日

前者巴黎朝報專電。謂法人探險隊勒穰德君在雲南被殺。各國新聞均極注意。本社已於上次編號第五百五

十五號通信中詳切言之。茲得確實消息。勒穰德並未遇害。德西海野亦並無致命之事。惟探險隊爲土人劫掠。則實有之。勒穰德君曾有家書詳記當日遇險情形。此書宣布之後。法人恐慌大定。原書略云。念五夜一點鐘。距黃晦峒（三字譯音）一啓羅米達之鄉村。突有中國人二百餘。攜帶刀槍礮彈。竟欲謀殺。連發礮彈五十餘響。然無一彈命中。惟最後短兵相接。致頭手受砍數刀。傷勢頗爲沉重。德西海野則右手被砍。皮膚破碎。其頭上亦有兩塊傷口。但不甚大。因其頭原包有棉花布巾也。余傷較彼爲重。頭頂受砍一刀。皮肉揭去。微露骨節。流血極多。使當時不以左手扞格。則刀勢落下甚重。畢吾命矣。然因扞格此刀。食指爲刀切斷。將指亦中刀甚深。至今此兩指尙不能活動也。當時來人原欲以刀抵頸。幸首刀至我領。隨即由肩滑去。次刀至我腰際。僅割去裝紙烟盒之衣袋耳。行裝全被搶劫。所餘者僅有隨身衣服。即欲設法看護傷痕。無如該處土人所織棉布。殊不合用。乃將隨身所帶不潔汗巾。浸潤滾水。略敷頭上傷口。所幸寒熱僅來兩次。隨即消退。不過身體略見虛弱。不致死也。當時脫險。亦極奇異。裝載行李之騾。爲槍聲所驚。逸退還原路。追余諸人。亦即羣逐此騾。意皆在分行裝。余等即乘此機會逃走。原有護衛兵弁八名及數僕人。均已先逃至附近相待。余等相遇於黃晦峒（三字譯音）。檢點人數。僅有舊仆安南人被殺。其屍身已爲該黨用刀砍碎。身上衣服均被剝去。當時若余等爲該黨所生擒。尙未審陷何慘境也。當余等至黃晦峒時。即要求該地保正。關閉各門。並責以保護生命。彼時匪黨連日懸有重賞。必欲購獲余等。幸余畧有歷練。到該處之第二夕。即在庭中得聞此種消息。設法規避。始免於難。余等居停張姓。在其地頗有勢力。彼亦略具兵隊。故不致爲匪徒所屢威嚇。彼又恐匪黨來。黃晦峒之小客棧。將余等擒去。遂再將余等移住於其他處莊屋。此莊屋有兩人看護。此西十月三十一號事也。余等住於該屋。至十一月八號止。因十一月四號匪黨敗績後。官兵於次日前來尋訪。從此遂出險矣。

比利時國防問題及軍事家欲脫中立之理由

正月八日

上月比國上下兩院有關於軍事之討論至爲緊要於全歐大局甚有關係各國輿論每以比之軍備不足恐其難守中立。雖經比政府屢次聲明列強終不敢信。均謂比宜盡力將安維斯海口及愛斯兩處更加嚴固。此次德法衝突戰禍迫於眉睫。比人一夕數驚。深感於陸軍之廢弛而武力之薄弱也。事後乃於議會提議各報攻擊尤厲。其最甚之事實謂當風聲緊急之時安維斯及麥斯兩處砲台多未設備。就中有缺砲位及藥彈者而砲台四周之阻攔物亦未安設。麥斯附近有數砲台竟至毀壞不堪駐兵。軍中復缺傳令用之火箭。此物比廠不能自造。須臨時向德之克虜伯廠定購。軍糧甚少毫無儲積。雖在外國辦有糧械。然皆運屯於安維斯船埠。並未分配於各要塞。凡此皆過去之失敗。自由黨及社會黨至以此彈劾政府。卒至全院投信任票。內閣不倒。則數黨辨護之力也。現時比人多數皆激發其愛國心。殊以國防爲念。以爲德法萬一有戰。必須令其尊敬比之中立。任何方面之軍隊皆不得假道比境。有逾此約。比當首先擊之。且盡所能以爲防禦。非使首破中立之國大受損傷。不足以保比之國榮。且亦比之所以自存之道。前此比人以爲敵兵過境。但在界內不爲戰鬥。原無妨礙。是特未思戰事定後之禍患耳。前王利物博爾第二有鑒於此。極力主張改革徵兵制度。屢爲議院所扼。倘能早行其策。則比之軍備當不如是之腐敗也。總之比有強大之武力。能令兩交戰國中尊敬其中立者有所見重。則兩強皆相持而莫敢發。戰禍或因以減少矣。比之政家及軍事家另有意見。欲令比脫去中立之羈絆。常加入於最強者之一面。理由至爲圓滿。彼其言曰。比之永遠中立。乃所以保全歐之均勢。陳詣甚高。比以絕大貸價始易得此中立條約。世人方爲比幸。實則比之困難及危險較無此約有過之也。今爲比計。當請列強開一公會。取消比之中立。則比庶得自由。倘非然者。一旦德法有事。比爲中立所束縛。勢將盡驅其民與首犯中立者抵抗。因此之故。比遂不得不助乙國而敵甲國。既助乙國。則以其運命與乙國相連屬。即使比兵戰勝。乙國不競。比亦同受其害。在戰略及政策上論之。比宜支配現勢。不宜爲現勢所支配也。比人不得謂

敵兵入比境後始爲犯比中立。須知敵於比境附近集兵已早。犯比中立此則德法所同。兩國與比連界。自有時時可以侵入之勢。比又何必俟其力強之一面。敢於穿境而過者。乃起而與之敵。不問感情。不審利害。事之蒙昧。有過於此者乎。況兵之取攻勢者。其力恆強於取守勢者。而勝敗之機先伏。比又何必常於敗之一面。連合其運命。而不加擇別於其間乎。摩洛哥問題未定以前。德實爲比好友。摩洛哥問題既定之後。法或較德爲佳。此中宜大加審慎。未可冒昧從事。若欲真槁不誤。當亟派參謀官駐紮於德法英和四國使館。細心研究。此事當以全國之利害爲本位。不當以感情之作用爲本位也。比人受法之文化最深。常爲法之意見所轉移。至宜注意德爲聯邦帝國政體。法爲共和政體。就兵事言。比終以向德爲愈。法自共和以來。內政分裂。日趨微弱。德則蒸蒸日上。有旭日當天之勢。況在兵事。原須保存一極大之階級思想。以共和爲政者。萬難與帝國主義相馳騁也。今法爲亞加提事件。激刺甚大。法人忽生其愛國心。軍事似有起色。惟此終不足恃。法之侵略時代現已過去。決非比之所懼。惟德亟欲得比。安維斯海口。此實大堪憂慮。近德在安埠之商務已占第一位。置區一城已有德人留居五萬以上。則其勢力可知。如欲不爲德有。非亟於要塞設防不可。而減輕德人移植之法。尤當於其入籍加之意也。

歐報對於中國革命之輿論

正月九日

其一

本月五六兩號。紐約克哈爾特北京專電。於上海和議一事。力袒政府而攻民黨。於輿論頗有影響。爰照譯之。第一電。伍廷芳請袁到上海議和。袁答以內閣事太繁重。不能離京。轉請伍親到京面談。伍亦不願離滬。乃改日電商也。居留中國之外國人。已漸不滿意於民黨之舉動。因其過於專橫。不許異己黨派自由表其政見。此次和議。伍廷芳提議各節。復太不近人情。南方各省上中社會。已漸不以民黨爲然。此間各使館所接各地領

事報告亦言往時本與革黨深表同情之人。現在均起反對。因伍廷芳拒絕袁內閣誠摯爲民之好意。頗滋不悅。自孫逸仙被舉爲大總統後。民黨中已漸呈分裂之現象。蓋不能盡泯其猜忌競爭之私念也。

第二電。各國駐京使館。得伍廷芳同樣照會。聲言此次談判不成。皆袁一人之過。兵連禍結。袁實負此責也。各國外交官深知此語不確。和議破裂。伍與其黨徒實尸其咎。召集國民會議。公決政體。原爲該黨所請。袁既允其照辦。該黨忽又翻悔。僅肯以南京會集少數代表。由各革命政府派出之人。作爲國民會議。其不足以得眞實之民意。可斷言矣。今日袁以所有與伍交涉之全案。抄送各公使閱看。公使均贊袁之公平正直。且稱袁之所提該者。皆係十分牽就。袁僅欲得全國之眞實民意。毫無錯處。可供革黨指摘。至於伍之態度猶豫。實似不敢深信全國眞實希望共和。卽於南方各省。現時爲革黨所占據者。彼亦不敢信其定與革黨表同情也。就此度之。則中國大多數人。並不贊成共和。更足證明袁之政策不謬。使館所得各地領事報告。多言各省大都督相爭之情狀。而其新用官吏。貪婪殘暴。實較舊政府有過之無不及。此皆其失民心之處也。

其二

本月五號倫敦每日電報新聞上海專電。謂和議已全破裂。袁電民黨。責其不應於國民會議未開之前。卽行選舉總統。任命各部大臣。是其意已無待問。諸民意。尙何談判可言云云。漢陽來電均稱連日皆有小戰。昨日官軍不知和議已經作罷。尙在繼續退出漢陽。革黨遂乘機進占其地。官軍乃回轉抵抗。遂至有一劇烈之爭鬥。今日共和政府成立。已有照會。請各國政府承認之。孫逸仙組織之內閣。頗爲人所驚異。因革黨中有多數重要人物。均未選入。殊不可解。

同報七號北京專電。謂袁內閣已得內帑。決意以其運命與皇室相連屬。國民會議一節。已歸無效。因上海與北京互相非議。感情已壞。不能再事調停。此皆唐紹怡之過也。現時官民兩軍之戰。決不能免。武昌民軍約有

八萬餘人。南京亦略相等。官軍約計尚有十萬左右。頃其作戰計畫。專以阻民軍之北上爲目的。已變攻爲守矣。中國各報謂今日已有特別組織之民軍侵入山東境內。孫逸仙致電與袁內閣。請其速逐滿洲皇室。或辭去總理大臣。此間西人均稱此爲孫致袁之哀的美頓書也。

其三

比京星報本日五號著論。謂孫逸仙被舉爲共和國大總統後。北方各君主立憲黨大不滿意。歐人均恐上海和議因此破裂。南北鬭牆之戰。又將劇烈。而其影響所牽及於世界之經濟者大矣。今日各處專電。情勢尙覺平靜。民黨與君黨皆頗鎮定。乃有互相調和之意。現係伍廷芳等與袁內閣直接電商。不用唐紹怡爲居間。因唐太偏於民黨也。袁已設法將停戰之約延長。特僅需以時日。於選舉議員及召集地點得同意後。國民會議即可成立。雖然。欲其平和轉圜。當於雙方極端之間。求一適中辦法。則君位之共和立憲。庶乎近之。袁之左右及各親貴。均知現時決不能再將皇室權利恢復如舊。已漸次趨集於折中之地點。而在民黨一面。亦知君主立憲於國有益。不過恐皇室再食前言。復以專制與民權爲難耳。惟其中有一部分於共和之外。不願有談判。彼等但知君位已倒。共和萬歲。其他皆非所問。倘有告以大多數人民尙未達此程度。彼等不以介意。且不肯信此爲真理也。彼等似忘其多數人民並不知共和爲何物。但以其在美洲留學時之所經驗。深爲大共和之潮流所陶融。故其信仰至深。有反對者。不問是非。但怒詈其愚妄而已。似此情狀。決不能再認滿洲爲君主。袁之苦衷。其能令此輩鑒及乎。就中國之利益及民生之幸福言之。當以上下交讓和局速定爲無上之美德。但能鞏固憲法。君位存留與否。不關緊要。以此糜爛其民。當非明達者所忍出此也。

倫敦每日電報新聞訪員與袁內閣之談話

正月十日

倫敦每日電報新聞北京訪員本日專電。謂今日一大幸福。得以謁見袁內閣於外務部衙門。特亟舉其所談。

電述如下。訪員首詢上海和議何以無好結果。袁即答曰。唐紹怡所議各節。實已越其權力範圍以外。並非政府所能許者。當漢陽克復後。余亟主張停戰。此非兵力有所不足也。因余深知欲爲根本上之解決。萬非兵力所能濟事。蓋其中有種族問題。有政治問題。醞釀蟠結。實非一日不爲根本上之解決。則亂事將平不勝平。惟有退而言和。俾民氣有所發抒。庶無橫決之患。凡此皆出余之本意。壹志孤行。並無第三人之勸告。尤非外國人之勢力所能影響者也。最可笑者。外間謠傳英日保障皇室。此亦言過其實。總之外人勢力在中國政治上。並不如謠傳者所述之大。不可誤會。以民意決定政體一層。實出余之中誠。但余所謂民意。乃全中國之意見。並非革黨少數之意見。余於此事頗費心力。卒得請於朝廷。以明詔宣布之。倘全國真願共和。則朝廷不惜遜位以避也。此爲有人類以來歷史上所未見。不得不謂退讓達於極點矣。革黨首領以爲余既可以允許召集國民會議。公決政體。余即不難允許以革黨少數之人充此國民會議之代表。此則彼等未免夢想。但使一息尚存。決無背謬至是之理。余現之所爭者。並非保障皇室之專制及特權。乃爲保障中國之安寧秩序。此爲世界所有政府惟一之責任。余不得不首致力焉。頗聞革黨欲借外債。以江蘇鹽稅及蘇杭甬鐵路江南製造局作抵。此則政府所萬不能承認者也。如有某國允許借款。則政府當視其國爲違犯中立。至於蒙古問題。政府不能放棄其前此整頓之政策。袁言及此。略爲停頓。旣而續曰。南北之爭。不能即平。將來結果如何。正難預料。余亦盡其力之所至而已。

歐報對於中國革命之輿論 正月十一日

其一

巴黎殖民電報。日前著論。對於雲南獨立。極力挑動法之野心。意至深微。茲略譯之如左。雲南夙稱盜藪。常有排外舉動。歐人生命財產。極不穩固。此其情勢之危。有非意想所能及者。試以印度支那來電觀之。則雲南與

東京接界之處。秩序大亂。已可概見。蒙自爲通商口岸。搶劫者環集其間。當防營兵變之時。城內中外商店。掠奪殆盡。歐人無兵可衛。均逃入法領事館。但坐視其財貨被劫。無可如何。有四法人。因其友居蒙自附近村間。欲往援之。遂爲亂黨所襲。三人重傷。一僕殞命。倘彼時在蒙自者。不速避往老開。必皆無幸。當其出險。實係印度支那總督派兵保護。現則老開已增兵矣。以上皆過去之事實。法人幸而免死。不得謂非總督之賜。惟其商務財產。法政府將坐視乎。雲南已陷於無政府之境。地。北京政府已無統治之力。法政府即當出而自衛。論者謂革黨已任保護。惟彼等中央政府成立。尙須時日。況其地與東京毗連。法政府之責任至明晰也。數星期前。俄以兵入波斯。僅以波人損及被保護者之財產耳。今法在雲南損傷既鉅。任何強國。不能謂法之派兵爲不然矣。法不願占土地。但俟秩序回復。法兵卽行撤退。此時歐美列強。對於中國交涉。固宜慎重。特亦不得過求省事。置人民權利於不問。倘英德所遇。亦如法之情形。彼等必早有以處。此可斷言也。

其二

巴黎時報專電。謂全印度支那境內。中國居留民約十七萬五千左右。皆稱孫逸仙之革命運動。純係模倣法國。現時法在中國勢力。必因此大爲擴張。惟不久必將大受其害。蓋安南人亦欲獨立自由。彼見中國革命成立。必大爲所影響也。現時印度支那各地。已有報紙及戲曲之自由。法政府務須於此留意。或能先事預防耳。

其三

路透電報。義館參贊衛達爾。由太原回京。謂其地情形極壞。全城秩序大亂。該地有義人四十餘名。均在危境。義使及英使當卽照會外務部。請其懇內閣。速派兵往太原。否則將出干涉。袁已電告伍廷芳。此實萬不得已。不得謂破約也。

其四

紐約克哈爾特專電。謂中國情勢。現已分爲二部。恰以揚子江爲界。北爲帝國。南爲共和。其屬北者。爲東三省。直隸河南陝西山東甘肅湖北之一部分。及安徽江南之一部分是也。其屬南者。爲浙江湖南江西福建廣東。廣西貴州雲南四川湖北安徽之一部分是也。就中惟山西陷於無政府之地位。四川則舊總督與民政府同。保治安。以俟和議定局。至各屬地。仍在北京政府主權之下。如西藏土耳其斯坦蒙古等。皆與共和運動無涉。僅有庫倫及烏里雅蘇台兩處宣告獨立。此僅蒙古與中國交界之處。非全蒙內地皆表同意也。

其五

每日電報新聞記者。日前在倫敦訪解剖學大家哥特力博士。詢問孫逸仙歷史。因哥氏爲孫密友。千八百八十七年。孫在香港肄業。曾親執贄於哥氏之門也。哥氏謂彼始終與孫相善。在中國人中。其聰明如孫者。實所罕見。彼敢信其定能組織一良好之政府。孫爲景教信徒。自幼卽受有完全教育。中國人有特性。富貴不足驕人。惟有學及有德。始爲社會敬尊耳。孫之流離在外。約二十年。經歷研究。至爲深厚。凡歐美人所知所能者。孫蓋無不知之能之也。當孫第一次舉義之時。爲千八百九十五年。共十六人。皆少年英俊。所謀不成。十五人皆死於難。存者僅孫一人。出亡英倫。千八百九十八年。倫敦中國使館。以詭術誘致。將送往中國。後以沙立斯布內閣干涉。始免於害。自是常遊美洲。出沒南洋一帶。屢次僞裝遊歷中國。爲革命之運動。卒成今日大功。其智勇誠不可及也。

其六

比國現爲天主教之中心地。因其憲法保障信仰上極點之自由。而政府復爲教黨。故法排宗教後。教會中重要人物。多居比京。日前比下院開會議員中有質問政府以在中國之比教士。究以何國爲保護者。外部大臣若言在中國之天主教保護問題。現時並無改變。法政府已聲明。但有教會請求。無不極力與北京交涉。昨莫

地野 *Morher* 主教亦宣言。法在中國爲天主教之保護者。此載於千八百六十年之北京條約。比教士在中國。屢得法之助力。此次革命之亂。遠東情勢恐慌。比京總會及在中國各教士。曾連名呈請法國政府。聲明對於法之保護。當永遠有信用。法國政府亦於日前公認爲在中國天主教之保護者。並以此節照會遠東總教主阿貝爾司 *Abels*。

法國加約內閣辭職

正月十二日

法國外部大臣德舍爾夫辭職。風潮所及。遂致加約內閣全體解散。其中原因複雜。而上院討論法德協約。實爲之導火線。昨午上院開會。議員克里蒙莎質問外部。當法德協約談判之時。謠傳法之外交機關不甚統一。是否於外部大臣之外。另有他人越俎。首相出席答言。此約除正式談判。並無他項運動。克氏謂余乃質問外部。應請外部出答。德舍爾夫乃起言曰。余有兩重責任。一爲誠實不欺。二爲忠於職務。法德協約談判。非余一人專辦。萬不敢諱言也。德氏既承認外交機關之不統一。且證明首相之欺妄。登時全院大譁。秩序擾亂。遂至停議。首相加約外部德舍爾夫未及原質問之議員克里蒙莎三人。同入休息室私談。移時首相出院。卽向大衆宣言。德舍爾夫辭職。當晚德氏捧呈辭表於大總統。略曰『今日上院大譁。僕不得不亟辭職。僕實不能處於無統一之意見及動作之地位。而久擔外交上之責任也。前此之未卽辭職者。實以欲先將此困難之法德協約了結。並得兩院之同意耳。但僕不敢妄語。並須尊敬僕之職務。故不得已而出此。至於大總統相待之盛情。固永銘感不忘也。』此事發現之後。全法輿論震動。此實開責任內閣之癩例。從未有閣員辭職。不先與內閣商議者也。且卽本內閣之閣員。而反對本內閣。其事尤足詫異。今日內閣開大會議。擬以海軍大臣迭爾加些轉任外部。迭氏已有允意。此新聞傳至外國。英政府頗不滿意。泰晤士報著論。至謂法現又起內閣恐慌。此種現相。於法之愛國者及法之友邦皆極不利。英甚盼法有一穩固之政府。英尤盼法政府中人超然於世界經